

Parada bon anima na Noord

ORANJESTAD(AAN):--

Apesar cu tabata tin menos participante cu aña pasa, pero reparti den un total di 14 grupo, Parada di Noord a resulta den un preciosidad diasabra, habriendo cu e acostumbrado grupito di prins y panchonan, sigui mes ora pa "cheerleadernan di Club di movimiento" acompaña pa Frahoma, cu na mes momento a acompaña "fantasia di Pisca" dirigi pa Titi Tromp.

Masha bunita presenta tabata e "Fantasia di Barbuleta y Tor" di Aurora Oduber y Marianita Figaroa cu tabata tin Eddy Tec pa musica y cu a wordo sigui pa e tradicional presentacion di "Chikitin Bin Bin" cu e aña aki a bin cu su "Fiesta di mangel" bao direccion di Carmen Frans y Sylvia Luidens.

E "Wega di blokki" di Leta Frans tambe tabata masha original y un maraviya tabata e "Festival di Botter" mirando con botter ta crece na mata riba un di e roadpiecenan, ilustrando e campaña di tene nos isla limpi.

Anchi Maduro y su grupo sigur a logra imponi esaki bon den mente di hopi.

Marushka Vanegas a presenta cu e grupo mas grandi di Noord, "Fiesta di Mascara" di Jacinta Kleuterschool. E ultimo dos gruponan aki tabata tin respectivamente Fly Fox Disco y Ken Disco pa musica.

Original Band cu mester a toca pa Chikitin Bin Bin y Fantasia di Blokki a haya problema cu nan sistema di sonido y a sali na Comercial Center di Bubali.

Un preciosidad tambe tabata "Fantasia di nos flora" cu su roadpiecenan di cadushi y parke Arikok. Mester menciona aki cu banda musical



Zodiac a zona masha fuerte y bon y a duna un presentacion mahestuoso di e roadmarch "Wave it" di Mighty Talent. E carosa "Cuida nos naturaleza" tambe tabata hopi bunita den e parada aki.

No por keda sin menciona e presentacion di Noord stars Steelband cu un biaha mas a wordo aplaudi masha hopi pa publico. AJMG dirigi pa Jeanette de Palm a presenta e "Fantasia di Sombre" cu musical di TIGO cu a resona e "Baricade" di Rusty y Climax masha bon mes cu mes ora nan tras Koyari presentando "Nos orguyo Sidney Ponson" cu ta un di e gruponan cu a duna honor na un di nos idolonan deportivo, algo cu hopi aña a wordo spera den un parada di carnaval riba nos isla.

Na e manera cu Benny Wolf y su grupo a presenta esaki, tabata un homenaje grandi na nos pelotero lanzador di Orioles y un promocion enorme pa Orioles riba nos

isla cu nan carosa special cu hasta cabez di Jan Poets riba dje como promotor di publicidad di Sidney y cu tambe a haya su honor merece.

Di e monedanan sinembargo a spera di mira mas di e monedanan di antes, pero lo cual a ser presenta den "Fantasia di placanan di antes" a resulta toch den lanta conversacion riba loke a bay perdi na Aruba.

E sonido di Daniel Disco aki tabata hopi bon, speakernan riba un trailer habri y cu bon sonido pa parada tanto dilanti como patras di e trailer.

Un celebracion di verdad taoata di "Calabas ta celebra prome lustro" cu su roadpiecenan precioso y

principalmente esun di e bolo tan apetitoso.

Quasi a resona hopi pa e grupo aki.

Tanto riba caminda di Boegoeroei-Bubali como riba caminda di Noord pa cruzada pabao di stadion y riba ruta pa Centro di Bario Noord, e publico a biba cu y aplaudi e gruponan, bailanda alavez riba e musica cu tabata tin pa tur grupo por a goza na abundancia.

Noord a celebra en grandi, pero kico por spera otro aña cu nan di 7 lustro no ta conoci. Sigur ta cu otro aña lo mira un di e paradanan mas bunita y mas grandi di Noord y e riba esey ta wordo spera awor.